

VIJEĆE MINISTARA BOSNE I HERCEGOVINE

234

Na osnovu člana 24. Zakona o internoj reviziji institucija Bosne i Hercegovine ("Službeni glasnik BiH", broj 27/08) i člana 17. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08), a u vezi s članom 90. Sporazuma o stabilizaciji i pridruživanju između Evropskih zajednica i njihovih država članica i Bosne i Hercegovine ("Službeni glasnik BiH-Međunarodni ugovori", broj 10/08), Vijeće ministara Bosne i Hercegovine, na 84. sjednici održanoj 16. aprila 2009. godine, donijelo je

ODLUKU

O USPOSTAVLJANJU CENTRALNE HARMONIZACIJSKE JEDINICE MINISTARSTVA FINANSIJA I TREZORA BOSNE I HERCEGOVINE

Član 1.
(Predmet Odluke)

Ovom Odlukom, u skladu sa članom 24. Zakona o internoj reviziji institucija Bosne i Hercegovine ("Službeni glasnik BiH", broj 27/08), uređuje se nadležnost Centralne harmonizacijske jedinice Ministarstva finansija i trezora Bosne i Hercegovine (u daljnjem tekstu: CHJ), način rada i rukovođenje, koordinacija interne revizije i uvođenje sistema finansijskog upravljanja i kontrole u institucijama Bosne i Hercegovine, kao i druga pitanja od značaja za rad CHJ.

Član 2.
(Status CHJ)

- (1) CHJ ima status upravne organizacije koja je u sklopu Ministarstva finansija i trezora Bosne i Hercegovine.
- (2) Unutrašnja organizacija CHJ utvrđuje se Pravilnikom o unutrašnjoj organizaciji koji odobrava Vijeće ministara na prijedlog ministra finansija i trezora.
- (3) Unutrašnju organizaciju čine organizacione jedinice od kojih je obavezno jedna organizaciona jedinica zadužena za uspostavljanje i razvoj sistema interne revizije, a druga za uspostavljanje i razvoj finansijskog upravljanja i kontrole u institucijama Bosne i Hercegovine.

Član 3.
(Ovlaštenja i odgovornosti CHJ)

CHJ je ovlaštena za razvoj, rukovođenje i koordinaciju interne revizije i razvoj finansijskog upravljanja i kontrole u institucijama Bosne i Hercegovine saglasno članovima 24. i 25. Zakona o internoj reviziji u institucijama Bosne i Hercegovine i članu 23. Zakona o finansiranju institucija Bosne i Hercegovine ("Službeni glasnik BiH", broj 61/04), uz koordinaciju s entitetskim centralnim harmonizacijskim jedinicama i saradnju putem Koordinacionog odbora centralnih harmonizacijskih jedinica s tijelima Evropske komisije, vezano za prioritetne oblasti pravne stečevine (*acquis*) Zajednice u oblastima interne finansijske kontrole u institucijama Bosne i Hercegovine, naročito, izradom i provođenjem odgovarajućih propisa u skladu sa međunarodnim standardima kontrole i interne

revizije, te metodologijama i najboljom praksom EU iz oblasti finansijskog upravljanja i kontrole u javnom sektoru, a odgovorna je za:

- a) pripremu prijedloga za izmjene Zakona o internoj reviziji u institucijama Bosne i Hercegovine, nakon usaglašavanja u Koordinacionom odboru CHJ;
- b) pripremu i provođenje programa obuke i certifikacije internih revizora institucija Bosne i Hercegovine, nakon usaglašavanja programa obuke u Koordinacionom odboru CHJ;
- c) usvajanje i primjenu standarda za internu reviziju u institucijama Bosne i Hercegovine i kodeksa profesionalne etike za interne revizore, nakon usaglašavanja u Koordinacionom odboru;
- d) usvajanje i primjenu radne metodologije interne revizije, nakon usaglašavanja u Koordinacionom odboru CHJ;
- e) usvajanje i implementaciju strategije razvoja interne revizije u javnom sektoru nakon usaglašavanja u Koordinacionom odboru CHJ;
- f) davanje saglasnosti na pravilnike o sistematizaciji organizacija koje uspostavljaju jedinice interne revizije u dijelu koji se odnosi na internu reviziju;
- g) koordinaciju rada jedinica interne revizije u institucijama Bosne i Hercegovine i uspostavljanje veza s državnim i međunarodnim institucijama u oblasti interne revizije;
- h) davanje saglasnosti na izbor rukovodioca jedinice za internu reviziju i na uspostavljanje odbora za internu reviziju;
- i) saradnju s Uredom za reviziju institucija Bosne i Hercegovine s ciljem ostvarivanja učinkovite i djelotvorne interne i eksterne revizije;
- j) nadzor nad implementacijom svih primjenjivih regulativa za internu reviziju od jedinica za internu reviziju;
- k) rješavanje neslaganja u mišljenjima, po zahtjevu i potrebi, između rukovodioca interne revizije i rukovodioca organizacije;
- l) definisanje kriterija za uspostavljanje jedinica interne revizije u skladu sa Zakonom o internoj reviziji u institucijama Bosne i Hercegovine;
- m) definisanje kriterija za zapošljavanje izvršilaca u jedinicama za internu reviziju i donošenje pravilnika o zapošljavanju internih revizora;
- n) definisanje vremenskog okvira eksterne kontrole kvaliteta i izbora osoba ili nezavisne organizacije za eksternu kontrolu kvaliteta;
- o) davanje saglasnosti za uspostavljanje odbora za reviziju u skladu sa članom 22. Zakona o internoj reviziji u institucijama Bosne i Hercegovine;
- p) predlaganje pravilnika o sistematizaciji CHJ, a isti donosi ministar finansija i trezora Bosne i Hercegovine uz prethodnu saglasnost Vijeća ministara Bosne i Hercegovine;
- r) provođenje aktivnosti vezanih za uspostavu i jačanje učinkovitosti sistema finansijskog upravljanja i kontrole u institucijama Bosne i Hercegovine u skladu sa dobrim međunarodnim praksama.

Član 4.
(Rukovođenje CHJ)

- (1) Radom CHJ rukovodi direktor koji ima status sekretara s posebnim zadatkom.
- (2) Direktora CHJ imenuje Vijeće ministara Bosne i Hercegovine, na prijedlog ministra finansija i trezora Bosne i Hercegovine, u skladu sa Zakonom o državnoj službi u institucijama Bosne i Hercegovine. Imenovanje direktora vrši se na period od 5 godina.
- (3) Osoba koja se imenuje za direktora CHJ mora imati visoku stručnu spremu - završen ekonomski fakultet s zvanjem diplomiranog ekonomiste, najmanje 5 godina radnog iskustva na rukovodećim poslovima finansijskog upravljanja i kontrole u javnom sektoru te relevantno iskustvo na poslovima vezanim za izradu legislativne iz oblasti interne revizije.
- (4) Direktor CHJ ima zamjenika, koji zamjenjuje direktora u slučaju odsutnosti ili spriječenosti da obavlja posao. Za imenovanje zamjenika direktora primjenjuju se stavovi (2) i (3) ovog člana.

Član 5.

(Dužnosti i odgovornosti direktora)

- (1) Direktor CHJ dužan je i odgovoran za:
 - a) predstavljanje CHJ;
 - b) rukovođenje i usmjeravanje u obavljanju poslova iz nadležnosti CHJ;
 - c) obavljanje drugih dužnosti propisanih Zakonom o internoj reviziji u institucijama Bosne i Hercegovine i drugim propisima kojima je regulisana uspostava sistema finansijskog upravljanja i kontrole;
 - d) izvršavanje svih odgovornosti, ovlaštenja i aktivnosti predviđenih članom 3. ove Odluke.
- (2) Direktor CHJ po dužnosti je jedan od članova Koordinacionog odbora CHJ Bosne i Hercegovine u skladu sa članom 27. Zakona o internoj reviziji institucija Bosne i Hercegovine.
- (3) U skladu sa članom 21. Zakona o ministarstvima i drugim organima uprave Bosne i Hercegovine ("Službeni glasnik BiH", br. 5/03, 42/03, 26/04, 42/04, 45/06 i 88/07) direktor CHJ za svoj rad odgovara Vijeću ministara Bosne i Hercegovine i ministru Ministarstva finansija i trezora.

Član 6.

(Prelazne i završne odredbe)

- (1) Vijeće ministara Bosne i Hercegovine na prijedlog Ministarstva finansija i trezora Bosne i Hercegovine u roku od petnaest dana nakon stupanja na snagu ove Odluke imenovaće vršioca dužnosti direktora CHJ i zamjenika direktora CHJ, koji će obavljati poslove do okončanja postupka izbora direktora i zamjenika u skladu sa Zakonom o državnoj službi u institucijama Bosne i Hercegovine.
- (2) CHJ će u roku od 30 dana od stupanja na snagu ove Odluke dostaviti, preko Ministarstva finansija i trezora, Vijeću ministara Bosne i Hercegovine prijedlog budžeta za 2009. godinu i prijedlog odluke o osiguranju sredstava za finansiranje CHJ u 2009. godini.
- (3) CHJ Ministarstva finansija i trezora Bosne i Hercegovine izdaće regulative, operativne procedure i metodologiju za internu reviziju, nakon usaglašavanja na Koordinacionom odboru CHJ Bosne i Hercegovine, u rokovima propisanim članovima 29. i 30. Zakona o internoj reviziji u institucijama Bosne i Hercegovine.

Član 7.

(Stupanje na snagu)

Ova Odluka stupa na snagu danom donošenja i objavljuje se u "Službenom glasniku BiH".

VM broj 113/09
16. aprila 2009. godine
Sarajevo

Predsjedavajući
Vijeća ministara BiH
Dr. **Nikola Špirić**, s. r.